

## **ASO FARAILE, 24 OKETOPA 2014**

*Na nofoia le Nofoa e le Fofoga Fetalai i le itula e 9.00 i le taeao.*

Tatalo.

**FOFOGA FETALAI:** Ou te talitonu o lenei ua tatou toe aofaga potopoto i lenei taeao fou ma e manatu foi o lenei ua tatou taunuu i le taunuuga o a tatou galuega i lenei vaiaso, ma o lo tatou aso mulimuli lenei. E le faaitiitia ai pea le agaga o le momoli atu o le faafetai i le paia ma le mamalu o lo tatou Maota i sui usufono uma mai lava i lau Afioga i le Palemia ma lau Kapeneta, aemaise foi le paia maualuga o le Palemene i ona tulaga faalupelupe, lau Afioga i le Taitai o le Itu Agai aemaise le paia maualuga i sui usufono uma o le Maota Fono.

Ua faamalo le onosai i lenei vaiaso - e talitonu ua faafofoga le Atua i la tatou tatalo i lenei taeao tatou te viia ai pea Lona alofa ma Lona agalelei, ona ua tau i manu mea uma i le faasologa o a tatou galuega mai lava i le Aso Lua, o lea ua tatou taunuu mai i le aso mulimuli lenei, o le Aso Faraile, o le aso foi lenei o le tatou aso puupuu, tatou te malolo i le itula e 12.00 i le aoauli. O le agaga faafetai ma le faamalo ona o le faasologa o a tatou galuega. E talitonu le faamoemoe o lo o tatou tiu pea i le latasi ma o tatou apefoe faatasi aua le tauavameaina ma le faasolosologa o a tatou galuega i tulaga masani.

Afai foi e i ai ni taimi e i ai ni nai galugalu, e leai lava se faiga malaga e le soua le gataifale ma tulaga i tau faateitei, a o le faamoemoe e tasi lava le tatou faafitiga o aleaga, o le faasologa i luma ina ia taoto lelei a tatou galuega i lenei aso.

E faafetai atu foi Samoa i lau tapuaiga, e lagona lava le mafanafana o le pai mai o lau tatalo ma lau faamanuia, aemaise le Aufaigaluega Paia i ona tulaga faalupe i so o se Fata Faitaulaga, e momoli atu le faafetai ma le faamalo ona o talotaloga aemaise o la outou tapuaiga, le Ituaiga Sa, ou te talitonu o i ina o lo o manuia ai le alofaiva o lau Palemene.

O lea foi ua tatou faalogologo i le upu o le taeao, “Ia faasasaga pea o tatou fofoga i le Atua.” Ia faasasaga pea o tatou mata i le Alii ma tatou vaavaai aua o Ia na te leoleo i lo tatou ulufale ma le ulufafo. Afai e i ai se isi o outou e le alu i le lotu ae ua lelei lenei tou te faafogafoga lelei ai i apoapoaiga ia ua avatu.

Alo maia i lenei taeao aua e talitonu le faamoemoe, o le a alu le tatou Fonotaga ma le talitonuga, e tau i manu mea uma i lenei aso.

**TULAFONO TAU FAAOFI O LE FONO A LE AU TUSITALA  
MA LE AU FAASALALAU 2014 – felafolafoaiga faaaauu i luga  
o le faitauga faalua**

**FOFOGA FETALAI:** E tolopo le Fono i le aso ananafi, ou te manatu ua matua saausi finagalo ma lagona o le paia ma le mamalu o sui usufono. Ua tatou taunuu tonu i le taimi e tali mai ai le Afioga i le Palemia aemaise o le Minisita e a ia lenei Tulafono Tau Faaofi, o lea ou te valaau atu ai i lau Afioga i le Palemia e te tulai mai ina ia tuuina mai le folasaga faai, ona avatu ai lea o le fesili aua le faaaauuina o lenei Tulafono Tau Faaofi.

Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai, ou te faatalofa atu i lenei taeao i le maleifua mai o lau Afioga i le Fofoga Fetalai faapea foi le mamalu o le Maota nei i le alofa matalasi o lo tatou Matai. E maea le tatou galuega i le aso ananafi ua ou faapai i se tasi o vaega sa laga i saunoaga a le mamalu o lo tatou Maota nei, ma o lea o le a faaaauu lau tautalaga agai atu i isi vaega o le Tulafono Tau Faaofi e pei ona aumai ai nisi o finagalo e toe silasila i ai le Malo.

O le tomua o upu i lenei taeao, o le faamanatu lea i aga masani a le Maota lenei o a tatou Tulafono Tau Faaofi po o Pili o lo o faaofi mai i le Palemene. E i ai lava vaega o a tatou Tulafono e le faanatinatia e tuuina atu i le Komiti o Tulafono Tau Faaofi latou te soalaupulea ma valaau ai foi le tóatele o le atunuu e omai e faaali o latou finagalo, aemaise o le Tulafono Tau Faaofi lenei, o le Tulafono Tau Faaofi e tagofia ai le aiatatau, e faaali ma faasilasila ai taofi ogaoga e le fetaoimi i lalo, aemaise foi o le aiatatau a i latou o le Au Tusitala.

Ua matua manino i folasaga mafaufauga loloto na faaalua i totonu o le Maota lenei. O le isi lea maa tulimanu o Faigamalo Faa-Temokarasi, o le faaaogaina o faasalalau e faasilasila ai faalauaitete faamatalaga o mea ua fai ma ni faaletonu foi o lo o matauina. Sa ou agai i le tulaga i le tóatele o i latou ua masoe o latou soifua ona o le faatinoga o o latou tiute i le lipotiina ma le faasalalauina o faamatalaga. O le mea lea e momoli atu ai le faamalo ia te outou uma sa saunoa i le Tulafono Tau Faaofi lenei, mo le faatuina o le Fono a le Au Tusitala ma le Au Faasalalau, faatasi ai ma le auiliiliina o ona tiute fai e faatonutonu ai galuega a le Au Tusitala.

Ua ou matauina o saunoaga uma lava i totonu o le Maota lenei, sa matua faataua le sao o le Au Tusitala ma le Au Faasalalau e pei lava ona ou taua. E le o se itu e toe tauiso o latou sao aoga. Ona pau lava atugaluga sa faaleoina ma faaleoina pea ma aumai pea i saunoaga, o le faataua e auala mai faafautuaga i saunoaga uma lava ina ia lipoti sao tala faasalalau ma ia tofu avanoa itu uma o aafia i se faasalalau e tapa ai finagalo o itu uma, ina ia le lilifa itutasi se faamatalaga aua o i ina e tupu ai le vevesi, ma e le o se naunautaiga lea o Taitai o le atunuu lenei ia faavevesi le atunuu talu ai ona o le le atoatoa o tapenaga a mea nei o Tusitala po o le au faitatala.

Silasila i le manino toe faigofie o le Tulafono Tau Faaofi? O le matua manino toe faigofie o le Tulafono Tau Faaofi. O le auau atoa lena ia paleni lelei ma sao le tala tusia. O le autu lena o le Tulafono Tau Faaofi, a o le mimilo, milomilo ma milo ma saga mimilo, e atili aliali ai le vaavaa. O ai

lava la se isi e tetee i le Tulafono Tau Faaofi lenei, o ia tonu lava lena o le ta'i o le amio lea o le tau faaleaga, o le tau faavevesi, o le tau faasese ma le talapepelo le mafaufau.

Ua tatou faitau uma lava i iuga o faamasinoga ua faia i lipoti sese ua faasalalau, ae a le anoano o le mau faatoesega e faasalalau mai i nusipepa ma isi auala faasalalau e atagia ai le leai o se atoatoa o i ai? O aga na o le Tulafono Tau Faaofi lenei, o le faataoto ai o taiala e ausia ai le atoaga e moomia mo galuega nei faatusitala ma faasalalau. Ona pau lava lena o le auala e siitia maualuga ai le tulaga taualoa o le tomai faatusitala i Samoa, professionalism and integrity of the highest order. Ua fia ea aiga ua faalumalumaina i ni tala le aiva'ā? Ua fia Ekalesia ma Faauluuluga o Ekalesia, o faifeau, o nuu ma aiga ua faalumalumaina pulega ona o le faaaoga sese i sini o le paoa o le saolotoga soona fai o le aiatatau e faasalalau ai?

I le vaaiga faaletulafono, o le faaleagaina o le tamaliiga o le tagata i se tala le sao ua tusia ma le iloa e sese, e sili atu lona matautia nai lo le solitulafono o le fasioti tagata faamoemoeina - character assassination vis-a-vis murder. Aisea e matuia ai? Aua foi o le fasioti tagata e sosoo ma lo tatou le toe vaaia o le tagata ua oti? Aua foi ua mou atu lona tino ola, ua oti i lona oliolisaga tumau. A o le fasioti tagata e ala i le fasioti o lona tauleleia po o lona tamaliiga, lau Afioga i le Fofoga Fetalai, o le tagata e soifua pea faaaauu ma faafeagai ma le vaaiga a tagata ma ona mafatiaga ma ona tiga i le maasiasi ma le faalumaina seia oo lava i le ituaso e valaau mai ai lona Matai. E faalumaina faatasi ai ma lona aiga, o le toalua, fanau, auaiga atoa ma le nuu. Ae mo le atunuu lenei o Samoa, e matua tu matilatila ai le tamaliiga o le tagata e le māmā ia i tatou uma aafiaga o le faaaoga sese o le aiatatau soona fai e faasalalau e aunoa ma ni pa puipui, o le soona faatasina i le ala o le mamalu o le uso a tagata. O le faapogai lea o le aiaiga i le Fuaiupu 4(2) lea sa taua i felafolafoaiga, e aloaia ai a tatou tu ma aganuu a Samoa ma agatausili i totonu o nuu ma afioaga.

Lau Afioga i le Fofoga Fetalai, o le Tulafono Tau Faaofi lenei e fou ia i tatou i Samoa, ae e le fou i atunuu i fafo e pei o Niu Sila ma Ausetalia na mua i malae i nei foi ituaiga atinae ma nei ituaiga taleni o le tusitala. Na latou faia ai foi ni auala e tau launonu ai nai a latou foi paumasi e afua i le faaaoga sese e a latou foi au faasalalau o le paoa o le aiatatau soonafai e faasalalau.

Lau Afioga i le Fofoga Fetalai, e tupu ae ai le lagona faaususili e mafai e le au tusitala ona lafotuina Malo. A lea na oo lava i ai isi saunoaga i le aso ananafi? E malamalama lelei i ai le HRPP, aua foi o uiga ia sa faaaoga i le valu o Faiga Palota Lautele i totonu o le 32 tausaga nei talu ona tulai mai le HRPP. Ae le i mafai e na faasalalauga ona aveese ai ia le finagalo lautele o le atunuu. O le faamaoniga o lea itu i auala o lo o fai e malo i fafo, o lea na tatou faaaoga lelei lava le fono e faatonutonu ai le amio o Tusitala a Niu Sila e faasala ai le latou Tusitala lauiloa foi lele o Barbara Dreaver i se tala na ia tusia foi e faalumalumaina ia lo tatou atunuu i Niu Sila, lea sa molia ai loa e auala atu i le tatou Matagaluega o le Loia Sili ia le mataupu lenei i Niu Sila ma manumalo ai tatou ma faasala ai lenei tamaitai i se sala tupe tele lava. O se tala na ia faia na matua faamaonia le pepelo ia ma faasala ai loa e le latou foi fono, lea e faataitai ai le tatou foi fono.

Lau Afioga i le Fofoga Fetalai, e le i mamao tele atu le isi foi nusipepa tautaua lava i Peretania, The News of the World mea na tupu ai, e 160 tausaga le matua o le nusipepa tautaua lea lauiloa i le lalolagi. O le alii

pilionea mauoloa o Murdock mauoloa e afua i tala anoanoai o tala pepelo na fai i lana nusipepa. Na iu ina tapunia taai fala ona o ni auala palapala piopio ma le alualua na ia faia, faia e ana Tusitala e faaaoga e aoao mai ai i se tulaga faagaai o meli e auala i telefoni faalilolilo i se tamaitai talavou na ave faamalosi ma fasiotia e ni tagata faatupu faalavelave. Ma o auala piopio foi na faaaoga e Tusitala a le alii o Murdock e gaio ai ia meli ma faavae ai latou tala maoae faatosina, faatosina i le vaai ma alu ai tupe a tagata e faatau ai nusipepa e sue tupe ai i le ola o lenei alualutoto. O uiga na alualua na iu ai ina tapunia lenei nusipepa lauiloa ua 160 tausaga le matua. E taua tele ai le tulaga lea o taiala, taiala lelei e limataitaiina ai le Au Tusitala, o taiala ia o lea e aumai i totonu o le Tulafono, code of practice, ua aiaia i lalo o le Tulafono e ao ona tapena lelei o le authority lea, o lea ua tuu atu i le Au Tusitala ai ia taiala mo le Au Tusitala. Ma o mea ia na fai i le pepa lenei a le alii o Murdock , o uiga piopio foi ia lea lava o lo o fai i Samoa nei i le aoaoina mai o faamatalaga e faasalalau ai ni amio piopio. A lea sa manino le taofi foi o le Fofoga Fetalai i le aso ananafi, o isi foi faamatalaga na aumai ae le i mautinoa pe faamaonia. O uiga na o lea foi e faaaoga i nei, e faaaoga ai tupe e ono aoao mai ai faamatalaga. O tuuaiga i le aafia o le Malo, lau Afioga i le Fofoga Fetalai ma foliga ai o le a pulea e le Malo le Au Tusitala, ou te manatu o ni manatu matua vaivai tele ia manatu sa faaalua ananafi.

Muamua, o ai ea e filifilia le Komiti Faafae latou te faafaea mataupu a le Au Tusitala? O le tali, o le Asosi o Tusitala. O lenei e aumai manino i lalo o le parakarafa 36 o le Tulafono.

O le fesili lona lua, o ai na filifilia le fono a Tusitala? O le tali, o le Komiti Faafae a Tusitala, na o Tusitala lava. O i i Komiti ia e lua o lo o fusia ai ma tau ai le paoa le paoa a le Au Tusitala latou te faatonutonu ai le amio a o latou lava sui. Ia e le i ai se Malo i totonu i i, o lea lava e filifili e latou Komiti ia e tuu i ai le paoa e faatonutonu ai lava e latou o latou lava sui i le faatinoina o latou galuega. I le 11 o sui o le Fono, o le lima o sui o tagata o sui o le Asosi, a o le isi lima, e filifilia foi mai le 20 o igoa e aumai e le fono a Tusitala.

Lau Afioga i le Fofoga Fetalai, ia se i silasila i ai i le faigofie o le Tulafono ma le pule po o le paoa o lea e i ai i totonu i le faafaeina o mataupu o le fono a Tusitala. E pau lava le taimi e ono tofia ai e Lana Afioga Mamalu, O Le Ao o le Malo sui o le fono le tumau o se fono le tumau, ona ua atagia mai ua le mafai e Tusitala ona fai se tofiga e tusa ai ma le fono e tataua ona faatuina e auala i le lē maopoopo ma le fetuiai, e faapena le mea na tupu e tupu soo i isi faalapotopotoga, na tupu i le Koluse Mumu e fetuiai. O lea e alaala mai i i se tasi foi sa Peresetene i le taimi tonu lea i le fetuiai o latou i totonu o le Komiti. Ua leai se toe malosia o toe i ai i le fetuiai. Ia manatua foi o isi Afioga ia a Iesu, e leai se malo e tumau pe afai e fevaevaeiina. Ia a o le tulaga lenei. O lea la na tofia ai ia se tamai Komiti e tauaveina le vaaiga o se Komiti le tumau ae se i toe matimati ia sui o le mataupu a sui o le fono tele o le Koluse Mumu, lea la e i ai nei le Koluse Mumu lea e tulai mai nei i lona malosia o i ai. E faapena foi le mea na oo i le tatou SASNOC, sa i ai foi le fetuiaiga. O le a la le mea na tupu? Ia na tapa mai foi i le Malo, ia na ou savalivali atu foi lea valaau le fono a tagata taaalo uma ia ma faia ai le Komiti latou te soalaupuleina mataupu o lo o mafua ai ia le feeseeseaiga ma toe tofia ai ia le SASNOC fou lea na sau ai lava lea o le Pulega ua maopoopo i lenei foi taimi, ia o lea foi la ua toetiiti foi toe oo foi i ai ia le faaletonu lata mai nei, o la lava

ua toe soalaupule ma toe fofo alamea ia mataupu a le SASNOC. E faapena la le malosi lea o lo o aumai i i e mafai ai ona tofia Le Ao Mamalu O Le Malo se fonu le tumau, pe afai e vaai atu e le o i ai se maopoopoga, aemaise lava o se fonu o lo o fautua e faatuina, e tele lona aoga i le tapasaina o sui o le Faalapotopotoga ia faatino lelei le latou galuega, o se galuega e taua e pei ona sausaunoa i ai a outou Afioga. E le mafai la ona fai na o le fonu ae taatia ese le Asosi e pei ona aumai i ina i le tele o saunoaga, ona e piilua ia itutino nei ma tiute fai i totonu o le Tulafono. O le tulaga lena o lea e i ai tiute e taua tele le Asosi mo le tofia mai o sui o le faiga o tofiga i le fonu e faagaoioia ia tiute uma e faamalosi ai le tulaga o le Au Tusitala. O le manatu faapea, o le a foi se Peresetene lea sa aumai, e faapea o lē sa Peresetene o le Susuga ia Uale o le tagata o le Malo. O le tofiga lava na faia e le Au Tusitala. A o lea foi sa ou maitauina lelei e faaauala mai ia Uale e faaauala mai ai le faafetai, ae nana mai ai i lalo lana naifi suluga e aumai ai se mau, o se mau e faapea, o Uale o le tagata o le Malo. E leai ma se feau a le Malo i le tofiaina o le Susuga ia Uale e avea ma Peresetene o lena foi Faalapotopotoga. O latou lava ia, o latou fonotaga sa latou faia le iuga. O le manatu e faapea, o le a auale i le fesoasoani lea tau tupe e avatu i le Faalapotopotoga o le a auale atu ai le malosi o le Malo e pule malosi le Au Tusitala, o le tali, ua faafia ea ona talosaga mai le Asosi Tusitala i le Malo mo ni fesoasoani tau tupe, e tele lava mea sa talosaga mai ai i aso ua tuanai, e agai tonu mai lava ia te au talosaga, aemaise nisi o fonotaga tetele sa usuia mai i Samoa nei e moomia ai le lava o le latou tapenaga, ia aua ne i vaemanua i le vaavaai mai a latou e omai mai fafo. Ua tele taimi e talosaga mai ai i le Malo, ia ma faamatu atu lava i ai e le tatou Malo fesoasoani, ae le o tuumamaina ai lo latou tutoatasi ma le anoano o faamatalaga faalumaluma ma faia pea ia te au ma le vaega lena Faaupufai aemaise o le Kapeneta, e le o taofia ai. O le a la le mea o le a ese ai lea mea ma le mea o lo o fai nei ma o lea lava e fai? O lea foi sa taua e se tasi o lauga le maualeaga maoae o le totogi o lo o faia foi e le Malo pei lava o tupe lea e fai e le Malo e fesoasoani mo le vaega lea.

Mo lau Susuga i le Taitai o le Itu Agai, ia ae pau lava lau galuega o lo o fai nei, o le faatetele ai atili o lou faaletonuga. O le fesoasoani a le Malo, e tasi lava le agaga o i ai, ia aua ne i toe vave mate lena fonu taua ma le aoga ona o le leai o se seleni e faagaoioi ai ma amata ai. Lau Afioga i le Fofoga Fetalai, o le mafuaaga foi lena o le fesoasoani o le augani o sui o le Au Tusitala i le vaivai tele o le latou Asosi o Tusitala i le itu tau tupe, ia ma e le tatau le tatau ona tuufau se o lo o vaivai i lona vaivaiga, ae tatau ona fai le fesoasoani ua talafeagai ina ia malosi ai e fai lona sao aoga. O le manatu faapea ua umi tele aso e taofia ai talosaga a i latou o faasea.....

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Alaala i lalo le sui usufono ou te avatua le avanoa pe a....o lea se i.....

**Afioga Hon Palusalua Faapo II:** Se i malolo le Afioga i le Palemia.

**FOFOGA FETALAI:** Alaala i lalo le sui usufono.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** O lea lava pe lua lava aso o ou tutu atu i i e leai se mea e te popole ai.

Lau Afioga i le Fofoga Fetalai, o le manatu faapea ua matua umi tele aso e tagofia ai talosaga i latou faasea, o lena e ootoo mai lalo o le Fuaiupu 18, 19 ma le 20. O le upu taua lava e tasi o le keyword, e tasi lava le upu taua lena e i ai e foliga mai o lo o misi atoa ia i latou na saunoa i le vaega lena, o le upu lea, “totonu”. O le ki atoa lena o aiaiga ia, e tasi lava le upu, “totonu”. I le faa-Peretania e manino ai, “within”. O lona uiga, o le 20 aso o lo o faaavanoa atu e le Tulafono Tau Faaofi e mafai ona soalaupule ai, ae a mafai ona faatino i totonu o le aso e tasi po o le lua, e tuu e a? E le tau faatalia la i le 20 aso po o le 10 aso. O le agaga atoa o le Tulafono Tau Faaofi, a mafai ona soalaupule i se auala taugamalie, ia, o le auga lena o faigamea.

Lau Afioga i le Fofoga Fetalai, o le Fono lena a le Au Tusitala, e le gata ina faataoto ai taiala e atili puipuia ai le taualoa o le tomai po o le taleni faa-Tusitala, i le uunaia lea o le tausisia o ni taiala e tusia ai tala faasalalau, ae o se toomaga foi lena taua toe taugofie, faigofie, mo latou e mafatia ona o tala faasalalau o aafia ai i latou, tala e le o lelei ona tapena i lalo o Tulafono o Taiala.

O lo o aiaia i le Fuaiupu 28 nisi o poloaiga e ono fai e le Fono lena e faasala ai le Tusitala ua faamaonia mai i susesuga o le Fono ua ia solia taiala ma o le tauai foi lea o le faasea. E pei lava ona fai foi e le Fono a Niu Sila latou i le faasea a le tatou Malo. O le faasalaga tupe maua o lo o aiaia, e \$5,000, o se tupe tele, e le o se tupe laitiiti, ma e mafai foi ona toe teuteu ma saga teuteu seia oo ina agai atu i tumutumu mauga, ae ave ia lea i lena taimi e amata ai.

Lau Afioga i le Fofoga Fetalai, e i ai nisi o faasea e faapea, e tatau ona fai ni aiaiga i le tagata e tatau ona avea ma Tusitala aoaoina, aua le tafaovale tafaovale lava lea sau loa Tusitala, ina ia ausia ni tomai faapitoa o le Tusitala ua faataatia i Tulafono. O lena foi o lo o i lalo o le Fuaiupu 32 faafuaiupu (4) le power e fai ai e le Asosi a latou lava Tulafono Faatonutonu mo sui auai, o mea masani ia e faia e Faalapotopotoga, o le faataoto o latou rules e mulimulitaia e sui usufono e mafai ona lotea ai aiaiga o agavaa e agavaa ai le Tusitala e fai ma sui auai o le Faalapotopotoga a le Au Tusitala. O lo o i totonu o le Tulafono Tau Faaofi tali uma lava faasea na aumai, pau lava si au mea lea e fai o le faapulapula atu o vaega eseese o le Tulafono Tau Faaofi, lea lava o lo o kava ai mea uma na laga. Ia manuia tele lau Afioga ma le tatou Fonotaga, manuia foi le au faitatala ua soona vevela ai fua le siosiomaga o le tatou Maota Fono. Soifua ma ia manuia.

**Afioga Hon Palusalua Faapo II:** Lau Afioga i le Fofoga Fetalai o se mea e fia faamalalama.

**FOFOGA FETALAI:** Malo saunoa i lau Afioga i le Palemia po o lau Afioga foi e a ia lena Tulafono Tau Faaofi taua. O le a le isi mea lea e ... Na tuu atu lava le avanoa ananafi...

**Afioga Hon Palusalua Faapo II:** Ioe, ua leva lava ona ou tutulai atu. Ona ua aafia fua le Taitai o le Itu Agai e tusa ai, ua faatusatusa faamanuiaga ma le totogi o le Taitai o le Itu Agai i le Tulafono Tau Faaofi lena. Ae manatia lau Afioga i le Fofoga Fetalai, e leai se mea e alo ai le Malo, e tatau lava ona fai

le mea e tatau mo le Itu Agai ma le Taitai o le Itu Agai. A o le mea lea na popole ai lou taofi....

**FOFOGA FETALAI:** Malie Palu o lea o le a faamalamalama atu...

**Afioga Hon Palusalue Faapo II:** Se i tuu mai sou avanoa lau Afioga ua alu le taeao o lauga le Palemia.

**FOFOGA FETALAI:** Sa tuu atu lou avanoa ananafi. O lea o le a ou tau faamalamalama atua le mea lea e te atugaluga ai ona lafo atu lea....

**Afioga Hon Palusalue Faapo II:** O se mea e fia faamalamalama lau Afioga e tusa ai ma le Tulafono Tumau.  
E le i uma ai lau faamalamalamaga lau Afioga.

**FOFOGA FETALAI:** O lea ua ou malamalama.  
Se i tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga, ou te le i avea le mataupu lena i se tulaga faapea e matuia. E le o se upu a au. Sa tatau ona e tali i le sui usufono na avatua le upu lea. Na pau lava lau mea lea e fai o le toe quote o upu ia na fai ananafi. Sa tatau la ona e tali i ai ananafi, a o lea ou te avatua, o le faatusatusaga lena a se tasi o sui usufono o lena Itu, ona o lou maemaea e talanoa i mea ia o tupe a le Malo. E avatu loa tupe a le Malo e aveese ai le tutoatasi o le tagata. E le o aafia lava lou tutoatasi, e te tutu ai lava oe i ina. E matua le aafia lava, ae tutusa lelei lava le mea lena ma lou totogi, o lea e faatupe e le Malo.

Lau Afioga i le Fofoga Fetalai, e le faapea la o ou avatua o sau mau. O lea ou te avatua, na ona ou taua o upu sa laga i le aso ananafi, afai la e faataua ia te oe, sa tatau ona e tu mai e faalavelave ananafi. Ua uma la lou taimi, e le toe i ai sou taimi e te faalavelave ai, o lea ua uma lou avanoa ananafi sa tatau ona e taofia ai le lafoga lea na fai ananafi. O au ia, o lea ou te tatalo e pei o le mea o le falemeli, na ona ou melia lava o mea, ae le o ni au mea.

**Afioga Hon Palusalue Faapo II:** Lau Afioga i le Fofoga Fetalai, o le atugaluga lava ia te au i le mea lea o le faatupega....

**FOFOGA FETALAI:** Palu, o lea ua uma ona ou taumafai atu. Palu, ou te le i faataga oe e te lauga a o lea ua e....

**Afioga Hon Palusalue Faapo II:** Silasila i le Savali ma le 2AP ua pulea atoatoa e le Palemia.

**FOFOGA FETALAI:** Palusalue, o e faafofoga mai i lau tala lea e fai atu, e fai atu lava ae fai mai lava. Palu...

**Afioga Hon Palusalue Faapo II:** Se o lea e taumafai atu lau Afioga.

**FOFOGA FETALAI:** Se o le mea lena e tau o le soli Fono.

**Afioga Hon Palusalue Faapo II:** E le o se soli Fono o lea ou te talosaga atu ona o le avanoa o le matou Itu.

**FOFOGA FETALAI:** Alaala i lalo, alaala i lalo. O le a tauau ina sese tele le mea lea e te fai sooa. Se aua ea le avatua lou faaloalo atu, o le a ova tele le mea lea... Se i vagana ua ou faataga oe ona e saunoa lea, ae te tu sasae ae lava i luga fai oe? O ni foliga na o se tagata e taitaia lena Itu e faataitai uma i ai isi tagata? O lea ou te taumafai atu. Vaai i le aso atoa ananafi, ua leva ona ou tuu atu le avanoa, na fai lava oe, le avanoa tele ma le avanoa sautuafafafa na avatu. O lea foi na e taumafai mai nei i le taeao, o le a e toe taumafai foi e toe laga mai le mataupu na ou taumafai atu ai ananafi. Aua le mamafa lou finagalo ne i meaane ua avea fesoasoani a le Malo e tolofia ai le faamaoni. A lea ua toe manino le faamalamalama a le Palemia, o lea foi o le a tatou toe agai foi lea i le faamanatu a le Minisita mo le Soifua Maloloina. O aveesea ai lou faamaoni i lou agai? O lea lava e te agai.

O le agaga lena na taumafai atu ai, a o lea e tau faamalamalama atu le mafuaaga tonu, aua ne i punitia le fesoasoani mo le Au Tusitala. O lea ua e vaai nei ua malepe le JAWS, matua masofasofa lava – de-register. Ona o le a? E le mautonu ma le mautu, feeseeseai loto. O le a la le mea a le Malo e fai? E tuu ai pea faapea? E tuufau faapea? O le tiute o le Malo, e vaai i itutino e fesoasoani mo le faamoemoe. O le ala lea o le Tulafono Tau Faaofi lea. O lea foi na e toe taumafai mai nei i le taeao, Palu, this is my final warning. Aua ne i e toe tulai mai tu lava alu oe. Lefau, ou te fautuaina lau Afioga i le alii Loia, faamalamalama lelei le Standing Order, o lau Afioga e le gata o le Loia, ae o lau Afioga o le Faamasino. Se i fesoasoani ifo. O le agaga ma le faamoemoe o le tatou tausii o le mamalu o le tatou Fono. Ia o lea o le a tauau ina faataitai mai ai isi, tu ae lava i luga alu. E le o se pafai le mea lea e nofonono atu i i. Palusalue, o lea ua ou fai atu, ua fa nei tausaga o ou tuuaulafo ma ou faaloalo atu pea i le tatou va, a o lea ou te vaai atu e le mafai lava ona outou agai mai i le tulaga lea e faamamalu le Fofoga Fetalai. Ua iu le mataupu, ua malamalama le tulaga o le Fono lenei, ua malamalama le mataupu.

Tulai mai le Taitai o le Itu Agai. O le mea lena e tau o le faatagaga, ae le o lou tu sasae ae lava i luga sau oe, aua o le mea lena na o le fetoi lava ma le pou uila.

**Afioga Hon Palusalue Faapo II:** Lau Afioga i le Fofoga Fetalai, ou te faamalulu atu, aua a ta le faapea foi, e taofi mai lava ita.

**FOFOGA FETALAI:** I have given you a lot of chances.

**Afioga Hon Palusalue Faapo II:** Ae faamalulu atu i lau Afoga pe afai ua laavale foi se faamatalaga. Ou te talitonu o Oe o le Fofoga Fetalai e tuuavanoa ma e maua le loto faamagalalo. O le mea la lea lau Afioga, e faamalulu atu pe afai ua laavale foi se amioga, o le naunau lava ia avatu se mau a lenei Vaega toaitiiti. Ia e tatalo atu i lau Afioga, ia faamagalalo mai foi lou nei sui usufono. Ma le faaloalo tele.

**FOFOGA FETALAI:** Ua talia lau faamaualaloga.



*Na faamaonia le lafo ma faitauina le Tulafono Tau Faaofi o le Fono a le Au Tusitala ma le Au Faasalalau 2014 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi i le Komiti o Mataupu tau Aoga, Saienisi, Fesootaiga ma Faamatalaga Tekonolosi mo le iloiloina ma toe lipoti mai i le Fono Aoa o se fonotaga o lumanai.

**TULAFONO TAU FAAOFI O TAALOGA A TUPULAGA TALAVOU  
A MALO O LE TAUPULEGA 2015 (TULAGA LAGOLAGO) 2014  
– faitauga muamua**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Taaloga a Tupulaga Talavou a Malo o le Taupulega 2015 (Tulaga Lagolago) 2014 i lona faitauga muamua.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TAALOGA A TUPULAGA TALAVOU  
A MALO O LE TAUPULEGA 2015 (TULAGA LAGOLAGO) 2014  
– faitauga faalua**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoa mo le faitauga faalua o le Tulafono Tau Faaofi lenei.

Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Taaloga a Tupulaga Talavou a Malo o le Taupulega 2015 (Tulaga Lagolago) 2014 i lona faitauga faalua ma ou te fia tautala faamalamalama i ai.*

*Faaluaina e le Sui Palemia.*

**FOFOGA FETALAI:** Tulai mai lau Afioga i le Palemia mo lau saunoaga faamalamalama.

**Susuga Hon TUILAEPFA FATIALOFA LUPESOLIAI AIONO NEIOTI**

**SAILELE MALIELEGAOI:** Lau Afioga i le Fofoga Fetalai, o le Tulafono Tau Faaofi lenei mo taligamalo a Samoa mo taaloga a tupulaga talavou, sa avea ai le tatou peti e auala atu i le Faalapotopotoga o Taaloga a Samoa e faia mai i Samoa nei, pe a ma le tolu i le fa tausaga talu ai. Ma e na oo mai i le tausaga talu ai, e i ai isi lavelave o lo o feagai pea ma tatou, e le na o tatou, ae faapena i atunuu uma ona o le tulaga lavelave, o mataupu faapenei pei e lua Faalapotopotoga e aofia ai. O le Faalapotopotoga o lo o nafa ma taaloga a le atunuu, o i latou foi nei e auala atu ai fesoootaiga i le va ma fafo, e faapea foi i le tatou Malo. E pei la o nai lavelave ia e tulai mai pea, na tulai mai i le tausaga muamua na tatou talimalo ai i le 1983, na tulai mai foi i le 2007, ae faapena foi ona toe tulai mai nei foi i le tulaga lava lea. E pei e faafoe le mea lea se i tulou, i se solofanua e lua ulu, e toso e le isi ulu i le isi itu, toso e le isi ulu i le isi itu. Ae o le uiga lea o mea o Tulafono Faava o Malo e Pulea Taaloga.

O le masina o Iulai i le tausaga talu ai, na oo mai ai le faasilasilaga i totonu o le lua vaiaso, a le maua atu se maopoopoga o tapenaga o i ai, o le a cancel le taaloga ona e i ai le taimi na motusia ai fesoootaiga e auala atu i le tatou SASSNOC. E pei la o nai lavelave ia na vave ai loa ona laa i ai le Kapeneta i totonu ma faatonutonu loa le faagaioiga o tonu fai ona o lenei, e tele lava le faamanuiaina o Samoa i mea faapenei. E faamanuiaina i le tulaga o le faailo atu i fafo, ma tele ai tagata e asiasi maimoa mai pea i totonu o Samoa.

I le fonotaga sa faia nei i Uosigitone, sa ou te i ina ua logo ae au e le Faauluuluga o Malo o le Taupulega, Malo e 54 ia, na logo ae ai au e le latou Failautusi Aoao, o lo o i ai le fonotaga a Minisita e fia fai, o Minisita e fitoitonu lava ma tagata talavou o le Taupulega, le Commonwealth, pe i ai sau fesoasoani. Ou fai atu, "Avatu i Samoa e fai ai i le taimi tonu lava lea e fai ai taaloga nei." O lona uiga la, o lea ua taotolua le seuga, e le gata o le talimalo i taaloga nei, ae talimalo ai foi i le fonotaga lea a Minisita o le Taupulega, e fitoitonu lava i mataupu tau autalavou ma a latou taaloga. E le toatele, pe a fua i atunuu e lata i le 200 lea na feagai ma tatou, na o le 54, o si tamai fono. A o lea e taotolua i totonu o le taimi lava lea e tasi. A o le agaga mauuluga e agai i ai le tatou Malo i le talimalo, o le tulaga lea o le faatoateleina ai, e ai ai a tatou pisinisi tau tagata tafafao maimoa mai fafo, ma atili faaopoopoina ai galuega maua a tatou fanau, aua e matua leai lava ma se aoga o nei mea tatou te faia pe a le tupu pea galuega. O lea e tupu pea le fai tamaitiiti, e le o se atinae o malolo ai le tatou atunuu, o lea lava ua amata ona vaaia le tulaga manuia foi lea o le fanau palasi o mea nei o ulugalii. Ae tatau foi la ona tatou fuafua mamao i tulaga e faatamaoia ai le tatou atunuu i galuega, ia iu mai fanau a o lea foi ua i ai ni nai galuega o le a faaopoopo mai. O lea foi e i ai le faamoemoe pe oo atu i le faaiuga o le tausaga nei ua tulai mai kamupani i'a ia e lua, lona uiga e ova i le 700 galuega e maua mai totonu o le taimi lea pe a amata galuega nei e lua, i le tulaga tau fale i'a nei e lua ua uma ona fai i ai iuga.

Lau Afioga i le Fofoga Fetalai, o upu tomua na o le Tulafono Tau Faaofi lenei. A o le agaga o le Tulafono Tau Faaofi, ia sao i manu le faamoemoe. O lo o i ai le agaga o tatou i le fonotaga lea na uma atu nei, o faigapaaga e tele ai galuega e mafai ona fai. O le agaga foi la lena o lea e i le Tulafono Tau Faaofi, ia faipaaga ma i latou i le private sector, i latou o lo o faia a latou pisinisi, ina ia lagolago mai i taumafaiga a le tatou Malo. O fale ia na fau nei,

o le tele lava o gaoioiga sa fai i fale ia tatou gymnasiums, e toe aoga uma lava mo taaloga nei o le Taupulega. O le ala foi la lena o lea sa ou faasilasila aloaia ai i le aso ananafi, o nisi o taavale ma nisi o aseta e moomia pea, ona o lo o i ai fonotaga ia e mulimuli mai, o fonotaga a Minisita o Mea Tau Fagotaga i le Tuna, ae o lea foi e i ai le fonotaga o mulimuli mai i le tausaga fou i le taimi faapenei, e o faatasi ma taaloga, a Minisita o le Taupulega.

O le Tulafono Tau Faaofi la, e uunaia ai mea o faigapaaga ma le private sector ina ia fai ma lagolago mai foi latou, e le faapea o le a tuutasi mai i le Malo, aemaise o nei mea, a fananau mai taumafaiga o fai nei, e toe alu lava le manuia i le private sector. O latou ia e toe faamanuiaina i gaoioiga o lo o tatou faia. O le mea la lea e tatau ai ona fesoasoani mai. Ae paga lea, e fai atu foi e fesoasoani mai ae fai mai foi, 'e a la pe a faapea e avatu le seleni ona toese lea o le lafoga.' E pei la o le agaga atoa lava lena o le Tulafono Tau Faaofi lenei ina ia aumai le latou fesoasoani, ae a aumai, ona manatua atu lea o latou e aveese le mea lena mai a latou lafoga. Ua manatu foi la le Kapeneta, o se mea lelei. Afai o le latou sao lena, e eseese lava auala e fesoasoani atu ai le tatou Malo e auala atu i le faamatuu o lafoga i le aofai o le tupe lena latou te aumaia. A o le Tulafono Tau Faaofi la e aofia ai foi ma tiute, o ni mea foi e aumai e faaoga i taaloga, e aveese foi ma tiute, ae muta lava i le aso e uma ai taaloga. O lona uiga, na o le tausaga le malosi o le Tulafono Tau Faaofi lea, ona otometi lava lea o le soloia ina ne i te i ua afaina foi teugatupe a le tatou Malo. A maitau mai lau Afioga i le Fofoga Fetalai, o le aso ananafi sa tatou talanoa ai e faamamaavega ia i latou e vaivai i mataupu ua le mafai ai ona latou totogia mea nei o loia taugata. O le taeao nei, o lea foi ua fai le faamamaavega mo le Au Tusitala e fai ai se fesoasoani e faafaigofie ai ona amata a latou galuega. O lea foi ua fai lea faamamaavega, na o le faamamaavega lava le mea lea e fai lau Afioga, ma le faamoemoe o le a lagolago e le tatou Maota si nei tamai Tulafono Tau Faaofi. Ia na o le pau lava lena o le aiaiga, o le matua minti minti o le Tulafono Tau Faaofi, e le o se Tulafono Tau Faaofi lapoa. Ia manuia le soalaupulega o le Tulafono Tau Faaofi.

**FOFOGA FETALAI:** Malo faafetai. Ia o le a tuu atu muamua le avanoa i le Taitai o le Itu Agai ona avatu ai lea o le avanoa i le sui usufono mo Faleata Sisifo.

Tulai mai le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, e puupuu lava lau fesili i le Afioga i le Palemia i lana folasaga manaia, faamamaavega i loia, faamamaavega mo taaloga, le Au Tusitala. A o lau fesili, a faapefea le atunuu i le taugata o le soifuaga? Maumau pe ana aumai se Tulafono e maua ai le faamamaavega i nai o tatou tagata.

**FOFOGA FETALAI:** O lea ua ou maua le.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, se i oo foi i le taimi e avatu ai le faamamaavega i le tau o le soifuaga, ona fai atu foi lea o le lauga ae aua le oso fua i lena mea ae tuu le mea lea, o le a tauau ina tuu maa ae maa i aau.

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai i lau Afioga i le Fofoga Fetalai mo le avanoa aemaise foi le mamalu o le usugafono a Samoa i lenei taeao, ae le gata i lea o le faafofogaaga a Samoa. Faafetai foi i le Afioga i le Palemia mo lenei Tulafono Tau Faaofi.

O le Tulafono Tau Faaofi lava ia e ave i ai le lagolago atoatoa, ae i ai nai vaega ia e fia fesili ai. Muamua, pe mafai ona lagolagoina Matagaluega a le Malo i Matagaluega Tumaoti ma Matagaluega a le Malo, pe mafai ona avea i latou ma nisi e lagolago, e ave foi la i ai le faamanuiaga lea.

Lua, o le Tulafono Tau Faaofi, o lea e aumai e faataga atu e le Palemene le faatinoina o galuega ma le tofiaina o tagata e agavaa, sponsorship, lagolago. Ae le o faamaninoa mai i le Tulafono Tau Faaofi, pe faapefea ona tofia le Board lea, le itutino lea po o le Kamupani lea. O le fesili la lea i lau Afioga, sa faapea e tatau ona aumai muamua le mea lea pe aumai faatasi ai, le tofiaina o le Board lea ma le Kamupani lea....

**FOFOGA FETALAI:** Malie le sui usufono mamalu se i avatu le faamalamalamaga.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le Komiti lea, e faatu i lalo o le Tulafono o Kamupani, Companies Act, lea foi na pasia atu i le tatou Palemene. O le mea la lena e le o aofia i i, ona o la e lava o lo o faatu le kamupani lea e vaaia galuega uma ia, a uma foi la ona toe soloia foi lea. O le ala lena e le o faatalia, aua na amata mai galuega i le la tausaga. O le faasilasilaga lena, e le o aafia, e ese le Tulafono Tau Faaofi lena e faatu ai, ma e le o se taimi muamua lea na faatu ai le mea lea, e oo loa i le taimi o mea o gaioiga e moomia ai se faaiuga, e pei lava ona ou tolaulauina atu i le amataga, toetiiti lava tatou a misi le pasi ona o tulaga ia lavelave i le va o le Malo ma le SASSNOC. E oo loa lava i tulaga faigata faapena, ona vaai loa lea o le Malo i auala taualoa faaetulafono, faaoga loa le Companies Act na pasia atu e le Palemene lenei.

**FOFOGA FETALAI:** Tulai mai le sui usufono mamalu e faaauau le saunoaga.

**Tofa LEALAILEPULE RIMONI AIAFI:** Faafetai. O lea la ua uma ona faatuina le Kamupani lea, pe sao ea au ua uma ona tofia ma faatuina. E sao le Afioga i le Palemia, e le o ni mea fou, aua ua tatou masani foi i le faiga o taaloga ma le taliga o taaloga, ae le gata i lea o le taligamalo. E avea foi lenei avanoa e faafetai tele ai i le Malo ma le tatou taligamalo ua tuanai atu, aemaise i le SASSNOC. E moni lava sa i ai ni feeseeseaiga sa i ai, ae faafetai i le finau o sui sa i ai ma i latou ina ia mafai ona aumai taaloga e fai i le tatou atunuu. O se tulaga lelei ma le maoae lea vaega e faaogaina ai o tatou fale taalo ma saga faalauiloa ai le tatou Malo. E le gata i lea, o fonotaga ia e fotuai mai. Sa maua foi i le tala, ia, i le Peresetene foi lea o Saina lea e fuafua e uma le fonu foi lea i Ausetalia sau i Fiti. Ou te talosaga atu i le Afioga i le Palemia, e tatau ona sau i inei le Saina lea, leaga o tatou na mua i malae i le va ma Malo, i lea foi taitai taua o le atunuu o Saina.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ne i te i ua aafia ai fua lo tatou va lelei, ae agai mai pea a tatou saunoaga i i i totonu i i i le Tulafono, manatua foi e leai ni a tatou vaalele e lele sao atu iinei i Saina, ae o le vaalele la e i ai a Fiti, e lele sao atu lava i ina i Saina o mea lava o femalagaiga, o le ala foi lena o lea e tatau ona amata i le tausaga fou i le masina o Ianuari po o Fepuari ona toe faafou le tatou fale faaee pasese, o le fale fou la lena o le a i ai mea foi nei e te savali atu ai lava pei o Niu Sila e fa, e te savali atu lava savali i totonu o le vaalele e alu atu i luga o le fogafale lua e le toe susu ai se isi. O lona uiga o le a pei lava tatou malae vaalele faatali pasese pei foi o Niu Sila, o le a faafaigofie lava i femalagaiga e amata la le atinae lena i le amataga o le tausaga fou. Ae pei o fuafuaga na a uma loa ona toe faafou uma le malae vaalele ia ma fale laupasese, o i ina loa ua faigofie i vaalele tetele nei ona lele sao atu lava iinei lele sao lava i Saina, lele sao atu iinei lele sao i Amerika. Ia ma o lea e i ai ia fuafuaga mamao a le Malo i se tulaga faapena pe a maea mea ia, o lo o i ai le faamoemoe o le amataga o le tausaga fou e amata faatino ai atinae nei.

**FOFOGA FETALAI:** Tulai maia lau Afioga i le sui usufono mo Faleata Sisifo e faaii maia lau saunoaga.

**Tofa LEALAILEPULE RIMONI AIAFI:** Faafetai. O le faafesili mulimuli lau Afioga, pe afai e oo i se tulaga o tupe tetele e miliona agai i luga se faamaoniga i mea ia tau tax credit po o le a le faatinoga o lea vaega pe tipi auauai fuafua ne i te i ua faapea mai se kamupani e avatu atoa sia faamanuiaga i totonu o se tausaga faaletupe e tasi. Ae afai e auauai, ia ona.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O lea ua ou iloa, ona o lau Afioga foi o oe o le Pule Sili o le kamupani a Aggie Grey, afai e aumai sau miliona, se o le matua taua tele, o le a ou matua fiafia e tilotilo i ai i lau mataupu.

**Tofa LEALAILEPULE RIMONI AIAFI:** Lau Afioga e le miliona e tatau ona ova atu.

Lau Afioga i le Fofoga Fetalai, e ese lava lenei taeao, faatoa ou vaai lava lea ua e tau toatamai, ae e te iloa lau Afioga, e te le fomu (onomea) ai, leaga o oe o le tagata o le Atua, peace in your heart, e.....

**FOFOGA FETALAI:** Leala, o lea ua faaii mai lau saunoaga.

**Tofa LEALAILEPULE RIMONI AIAFI:** O le Salamo ananafi lau Afioga, a e faia mea lelei e pei o le laau toto i tafatafa ane o le vaitafe, ioe, a o le Salamo i le taeao lenei, ia silasila i le Atua e aumai ai lou fesoasoani, aua e te amanaia lou uso le Afioga i le Taitai o le Itu Agai, a i ai se faaletonu, toe faafoi le taavale, ioe.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, na o le pau lava le mea ou te

fautua atu, o le sao o le upu o le vaiatafe tafe lemu, ae so o se vaiatafe lava e tafe saosaoa e leai lava ma se laau e ola ai.

**FOFOGA FETALAI:** Ia.

**Tofa LEALAILEPULE RIMONI AIAFI:** Faafetai lau Afioga, leai o le laau e toto i tafatafa ane o le vaiatafe, e le totona i totonu o le vaiatafe.

**FOFOGA FETALAI:** A o le vaiatafe.

**Tofa LEALAILEPULE RIMONI AIAFI:** Lau Afioga i le Fofoga Fetalai, se i fesoasoani ane i le Afioga i le Palemia i le vaivai i le Tusi Paia i le mataupu silisili.

**FOFOGA FETALAI:** Ia ua e iloa foi le nuu o le Atua Leala, osana, aleluia, viia le Alii. O latou foi ia na toe valaau, ina faasatauro ia te Ia. Tau taofiofi mai la lo outou taufaavalea o le Fofoga Fetalai.

Ia e manatu ona o lea ua tatou taunuu i le tatou taimi malolo, o le a faataatia ese Tualumaga a le Fono Aoa mo lana malologa masani o le taeao.

*Na faataatia ese Tualumaga a le Fono Aoa Faitulafono mo lana malologa masani i le itula e 10:13 i le taeao ma toe amatalia i le itula e 10:52 i le taeao.*

**FOFOGA FETALAI:** Ou te faasilasila atu ua toe amataina nei Tualumaga a le Fono Aoa Faitulafono. Ia e talitonu le faamoemoe o lea ua tatou taunuu mai i le vaega mulimuli o le tatou Fonotaga i lenei vaega o le aso. E mautinoa foi o lea ua maua la outou faasiliga malosi e ala i le tatou mafutaga ma sailiga malosi e ala mai i le tatou malu taeao i lenei taeao fou.

E faia le tatou malologa o faagasolo le tulai mai o lenei Tulafono Tau Faaofi taua i lona tulaga faanatinati, ma o le avanoa lenei ua ou toe tuuina atu i nisi sui usufono e faaauau ai felafolafoaiga.

Tulai mai le sui usufono mamalu mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu. 3):** Faafetai i lau Afioga i le Fofoga Fetalai mo le avanoa, faafetai foi i le taumafataga na saunia e le Matagaluega.

Lau Afioga i le Fofoga Fetalai e fia faaalua foi se manatu i le Tulafono Tau Faaofi pei ona faataatia mai i le Maota. Muamua lau Afioga i le Fofoga Fetalai, e faaopopo foi se agaga faafetai e le gata i le Malo ia a o Faalapotopotoga foi sa o latou tapenaina le PETI po o le BID a lo tatou Malo lea ua mafai ai ona faataunuuina nei Taaloga i le tausaga fou i Samoa. E faafetai foi lau Afioga i le Tulafono Tau Faaofi ua faataoto nei e talitonu o se Tulafono taua ona e ao foi ina faagaioi ma faataatia polokalame aua le tapenaina o ia taaloga. Pau vaega e avatu ai se tuualalo lau Afioga i le Fofoga Fetalai, atonu o le faanaunautaiga ina ia pasia, ia a o motugaafa ina ia mafai ona fesoasoani foi i le tapenaina ma le faatinoina o galuega o le a faapea ona feagai ai ma lenei kamupani.

Muamua lau Afioga i le Fofoga Fetalai, e fia maua sina malamalamaaga i le vaega ua ala ai ona aumaia lenei Tulafono o se Kamupani. Sa maua i se tasi o faamaumauga a le faamatalaga foi i le faamalamalamaaga a le Afioga i le Palemia, sa faatinoina foi i tausaga ua tuanai – ma o le tulaga urgent, o lea e i ai. Peitai ane lau Afioga i le Fofoga Fetalai, e tau maitau atu foi i nisi o vaega sa faatino faapei o le South Pacific Games, ia o lea sa faatinoina le authority, ae peitai ane, o le faanaunautaiga lava ma se atugaluga lau Afioga i vaega o kamupani, ia pei o lea ua matuu ese atu ma le Palemene le iloilo ina ma le faatinoina ma le lipoti mai o le faatinoga o nei Kamupani, peitai ane o lo o i ai a tatou Ministries ia o tatou SOES foi, ia pei o latou ia a maea i tausaga taitasi o lea e aumai lipoti ma iloilo ina i totonu o le Palemene, ia ae peitai ane o lenei Tulafono o lea o le a faatino i lalo o le Kamupani Act, o lona uiga, e le toe i ai se aia a le Palemene ona o lea ua tutoatasi e le manaomia le lipoti mai i le Palemene, peitai ane ia ua tele foi seleni ua faapea ona faamatuu atu e le Palemene, e i ai foi le talitonuga, o le tele o nei taaloga ia o le a aafia ai le tele o Matagaluga ma Pulega foi a lo tatou atunuu. E fia maua ai la se malamalamaaga, pe aisea ua faatuina ai o se kamupani ae le faia pei o se Authority pei foi o tausaga ua tuanai – ma a oo foi ina faamaea ia galuega e mafai ona lipoti mai i le Palemene ma i ai foi ni atugaluga po o ni fesili foi e fia malamalama atili ai.

Lona lua lau Afioga i le Fofoga Fetalai, o mea lava nei o kamupani nisi o vaega o lo o sau, afai e faatuina lenei kamupani ia o polofiti uma a le kamupani e alu ia i latou e shareholders. O le atugaluga la afai i te i ua fai ifo shareholders e i ai ni tagata faipisinisi po o ni tagata taitoatasi sa latou fai shares ae le togia own e le Malo, o lona uiga atonu foi o lea o le a tau e i latou ia any profit o le a maua. O lea foi sa sau ai i lalo o se isi vaega o le Tulafono, e exempt mai income tax le kamupani. Ia o se fesoasoani po o se tuualalo foi, ina ia mafai ona toe silasila i ai i lea vaega ona o le toatele foi o tatou kamupani foi po o SOE, o lea e totogi tax. Ae ao ona silasila i ai po o talafeauga ia pe i ai nisi fuafuaga e mafai ona maua mai ai foi se tax a le tatou Malo.

Lau Afioga i le Fofoga Fetalai o le vaega lea i sponsorship, e talitonu lau Afioga i le Fofoga Fetalai o le tatou SIDS ma taaloga a le SPG o atunuu laiti, peitai ane o le Taaloga lenei o Commonwealth Games pei ona taua e le Afioga i le Palemia, e 54 atunuu o le Commonwealth, o le tele foi o ia atunuu e tele a latou tupe, o duty rights foi ma le tele o sponsorships o le a maua, ia o kamupani e i fafo atu o le Pasefika, o kamupani tetele e mafai ona faasalalau atu i fafo i ia atunuu. E avatu ai le tuualalo lau Afioga i le Fofoga Fetalai e tauala atu i lau Afioga i le Fofoga Fetalai i le kamupani o le a faatu, ina ia toe silasila i ai ina ia aua ne i...aia e talitonu e tele se seleni o le a mafai ona maua mai ai i le faiga e le gata o duty rights a o nisi foi o kamupani pei o le NIKE ia o kamupani a latou o lo o feagai ma taaloga o le a tele so latou sao ina ia mafai foi ona maua se seleni a lo tatou atunuu, e le gata o vaega o le a omai ma faalauiloa i lea taimi, ia a o equipment foi ina ia aua ne i...ia maua lava se fesoasoani e le gata na o le sponsorship ae ia i ai foi tuutuuga ina ia mafai ona maua se isi seleni i luga atu a le tatou atunuu.

Lau Afioga i le Fofoga Fetalai, pei na o le pau ia o vaega e avatu ai se tuualalo i le tapenaina o lenei Tulafono Tau Faaofi, faafetai.

**FOFOGA FETALAI:** Malo faafetai. Ia tulai mai le Afioga i le sui usufono mo Palauli le Falefa, ia ona sosoo ai lea ma se tasi o sui usufono mo Salega, Afioga Afualo Wood Uti Salele.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai, ua ou tulai ona sa feagai ai lou taimi ma taaloga e fai ma taua o Taaloga a le Pasefika. O lenei Tulafono Tau Faaofi e muamua ona ou momoli atu le faafetai tele i le Malo aemaise o le Afioga i le Palemia o lo o faia lenei Tulafono. O le mea muamua lava o lea o lo o tausia e le Malo lana Anavatau, o le atinae o kamupani tumaoti o le afaipisinisi tumaoti, ma o le agaga faafetai lea i lau Afioga ma le Kapeneta ona o le amanaia o i latou ma le faatuatuaina o le afaipisinisi tumaoti, lea ua laalaa ai tatou i le tulaga lea. Ma e o lenei taligamalo lau Afioga i le Fofoga Fetalai ma le mamalu o lenei Palemene, e le o se taligamalo e manatu faatauvaa ai le atunuu, aua o le taligamalo ua toeitiiti lava faatoluina atunuu ia sa tauva i tatou Taaloga o le Pasefika ia ma atunuu ia. O lona uiga o le 54 atunuu o le a tauva i taaloga ia o le a fai mai iinei, toeitiiti lava faatoluina ia le aofaiga o atunuu sa i ai i le South Pacific Games. Ma o sponsorships ia ou te tilotilo atu i ai i le tulaga o le Tulafono Tau Faaofi, pei e foliga mai o mea tau tupe, a o le tele o sponsorship pei o le taaloga lea na tuanai atu, e mafuli foi i mea o in kinds sponsorship, e le aumaia ni tupe ia ae aumai....o lona quantify ia ona fai ai lea o le entitlement, ou te iloa o le tulaga lea.

O le faafitauli sa feagai ma le Komiti Faafaoe i lona foi vaitau i a tatou taligamalo o le Pasefika i Saute, o le mea lava lea o le copy writes na tele ai ina tele le nunu, o lea a e i ai le tatou Tulafono, ia ou te iloa foi e refer i ai i le taimi e moomia ai.

Lau Afioga i le Palemia, o le tasi lona faafitauli sa feagai ma le tatou taligamalo i le South Pacific Games, o mea lava o le finauina o le copy writes o i latou e aumai a latou tupe e aumai ai ma tuutuuga.

E pei lava ona taua e se tasi o sui usufono, o le coverage lea o le a i ai nei e ova ou te iloa o le lalolagi atoa, e le pei o le mea sa i ai le South Pacific Games na o le Region ma le Oceania, a o tatou Taligamalo lea lau Afioga, ou te iloa o le a tele foi tagata e sponsor mai e latou te finauina le avea o latou ma Official po o Official Carriers po o vaega foi latou te tauaveina mea nei o news i le lalolagi – ma ou te iloa e mafuli i ai ia ma o le aoga foi o nei mea, e lauiloa atili ai Samoa e le gata o ana aganuu, o agaga tusaafia o le atunuu, ia ae faapena foi ona atili ai ona tele a tatou pisinisi ma galuega o le a maua e o tatou tagata. O lea sa taua e se tasi o sui usufono faapea e tax free le kamupani lea o le a ave i ai, o lau faitau i le Tulafono pe a faapea e sao lau maitau, e le tax free ia le kamupani o le a tuu i ai le responsibility lea po o ni kamupani, o le tax free ia o mea o sponsors, o lau lea malamalama i ai ma o lea e sao lelei le Tulafono Tau Faaofi.

Lau Afioga i le Fofoga Fetalai, ia o nai tuualalo ia ona o experience sa maua mai i a tatou taligamalo o Taaloga a le Pasefika. Ma lou faaaloalo lava.

**FOFOGA FETALAI:** Malo faafetai fesoasoani mai i le sui usufono mamalu. Tulai mai se tasi o sui usufono mo Salega, Afioga Afualo Wood Uti Salele.



**Afioga AFUALO WOOD UTI SALELE (Salega):** Faafetai lava i lau Afioga i le Fofoga Fetalai. E toe momoli atu foi le agaga faafetai o le sui usufono mo Salega e tusa ai o le Tulafono Tau Faaofi.

E muamua lava ona faafetai i le Afioga i le Palemia aemaise foi o le Malo ona o le avanoa taua e mafai ai pea ona faatosina ma aumai le tele o fonotaga ona o lea faatoa maea nei le isi fonotaga tele a le SIDS, ma isi fonotaga ia e loma nei aemaise o taaloga a Malo o le Taupulega.

A fua lava i le vaai faale-mafaufau, e uma loa le olimipeka, ona sosoo loa lea ma le Commonwealth i lona aoao tetelega e le gata i le tóatele o Malo e auai, o au taaalo o taaloga eseese aemaise foi o le faasalalauina i le lalolagi atoa. O le tulaga la lea e taoto mai ai i le Tulafono Tau Faaofi, ou te faafetai ona o lea ua i ai le agaga e tausii pea i le faiga paaga lea a le Malo ma faalapotopotoga ma pisinisi tumaoti, ona e moni lava o le Malo e amatamea, ae galulue faatasi ma faalapotopotoga ma pisinisi tumaoti ina ia saga faatupu ai pea le atinae o le atunuu i ona vaega eseese.

I le fesuaiga la lea ua i ai nei aua e pei ona sausaunoa foi nisi o sui usufono i lalo o taaloga a Malo o le Pasefika, atonu o lea sa ese le faatinoina a o lea ua aumai nei i lalo o le Tulafono Tau Faaofi lea i ni fesoasoani mo i latou o le a mafai ona ofo mai auaunaga e 100%, aua e leai se lafoga e tologiina ona o se galuega lelei. E le gata i lea aua o taaloga a le Pasefika, e pei lava e 200% sa i ai, ae ona o lea e pei ua silasila ua tele le malae lea o le a taaalo ai e tusa foi o fuafuaga, ua talafeagai lava le 100%.

O le isi la vaega e sili ona ou lagolagoina ai ona o lea ua aumai i lalo o kamupani ma ua faa-kamupani. Aua e pei o i ina o le a mataitu ai aemaise lava e tatau ona aumai uma i totonu faamaumauga ua uma ona faamau i lalo o suesuega faava o Malo aua e tusa o lea ua pasia i lalo i international standards mea ia o audited reports, e pei o le vaega taua lava lea. Atonu po o a fuafuaga i le lumanai, a o lea ua taoto tonu lava i le taotoga e tatau ona i ai.

E oo foi i kamupani, e tatau foi ona tologi ni a latou lafoga aua o lea ua tele le fesoasoani a le Malo lea e i ai e ala atu i e o le a mafai ona faipaaga e faamama-avega, e ave i ai le 100% o le leai o se tului o lafoga. A o i latou ia o le a faagaioia kamupani e tutusa uma lava ma isi kamupani, e tatau lava ona fai so latou sao i le atinae o le atunuu e ala i lafoga ma faiga faavae ia ua uma ona faataoto i lalo i le Ofisa o Lafoga.

Ona faaiu atu ai lea o sau faamatalaga lau Afioga i le Fofoga Fetalai, e lagolagoina e le sui usufono mo Salega lenei Tulafono Tau Faaofi ona ua tatau lava ona faagaioi, aemaise lava mo le agai atu i le tele foi o isi fonotaga aemaise o le sauni atu mo taaloga tele nei a le Commonwealth. E avatu ai foi le faamalo ia i latou sa tapenaina lenei faamoemoe, malo lava le taupati ona o lea ua tino mai manuia. Aua o le mea lea e tau o le tamaoaiga e maua mai i mea e le tele ai ni mea e tologi i lafoga, ae i ai mea ia e tau o multiply effects. E pei o vaega uma ia o lea o le a tali mai ai le tamaoaiga i ona vaega eseese e manuia ai lo tatou atunuu.

O le faamatalaga puupuu atu lea, faafetai i lau Afioga i le Fofoga Fetalai mo le avanoa.

**FOFOGA FETALAI:** E matau atu ua leai se isi e toe fia saunoa, ae tulai mai lau Afioga i le Palemia e talifuaitau ona faagasolo ai lea o le Tulafono Tau Faaofi.

**Susuga Hon TUILAEPFA FATIALOFA LUPESOLIAI AIONO NEIOTI SAILALE MALIELEGAOI:** Lau Afioga i le Fofoga Fetalai, ou te faafetai atu i saunoaga e lagolago ai lenei foi faamoemoe. O le mea moni lava, ana leai le tulaga o le tagi mai a sponsors ina ua ave i ai tusi a le tatou kamupani lea mo se faamama-avega, meamanu e leai se Tulafono e tau aumaia e teuteu ai le Tulafono e maua ai le avanoa mo i latou e faatosina ai e fesoasoani mai i le faamoemoe o le atunuu, aemaise e toe manuia ai lava latou. E faatau ai a latou oloa eseese pe a tóatele i latou e omai. O le tulaga sao lena, se meamanu e le tau aumaia se Tulafono, ae sa amata lau tautalaga i tulaga maaleale na i ai.

Na o le lua lava vaiaso na tuu mai ai tatou e soalaupule, afai e le mafai ona tali atu i mea na aumai, ua leai se tatou. E le faia mai iinei taaloga ae toe ave i se isi mea ma o la foi e tele atunuu na fai muamua ai, e mafai lava ona toe ave i ai. A o le naunau e mataga le toilalo o tatou ua le mafaia se mea, a o lea tatou te iloa lelei ua taotolua le seuga i le faamoemoe, o le tele o mea ia e fai i ina mo le fonotaga a le SIDS, e toe aoga uma lava i ina fale ua saunia ma fale taalo ua faaleleia atili. O lona uiga o se matua misi tele le misi lea, ae e le i tuuina la i ai ma le faagaoioiga o isi gaoioiga e tele e mulimuli mai e pei o mea tausami ma mea faapena i le taimi e faafoe ai taaloga.

O le tulaga lena o lea na ala ai ona tuu avanoa i kamupani o lo o fia lagolago mai, ma o le tele foi o kamupani e faapena le tulaga lea e i ai le tatou lalolagi, e i ai kamupani e manao e fesoasoani mai ae ia aoga le latou fesoasoani mai e toe atili taulia ai a latou oloa. O lona uiga latou te faaaogaina taaloga, o se auala e faalauiloa ai lo latou loto atunuu ma faatupu ai le alofa o tagata e o atu e faatau mai a latou oloa. O lona uiga, e leai lava se mea e igoa o se free lunch i le olaga lenei. E togi le moa ae taofi le afa, e i ai foi le manuia la e mananao latou ia latou maua ma o le ala lena o lea e tatalo mai ai.

E i ai le fesili na aumai e faapea pe agavaa ai ma Faalapotopotoga a le Malo. O le tali, e i ai lava Faalapotopotoga a le Malo ua faapitoa i mea ia e mafai ona talosagaina. O le TAB le isi Faalapotopotoga, o lea la e avanoa i ai seleni o lo o maua mai i mea nei o taaloga e i ai lulu ma le casino i le TAB. E i ai foi le Faalapotopotoga lea o le SIFA. O le tatou faalapotopotoga lea o lo o fesoasoani mai i le faatupeina o lakapi. O faalapotopotoga la ia e ono agavaa e avea ma sponsor po o i latou i totonu o le lio lea mo le fesoasoani mai i lo tatou faamoemoe.

E i ai saunoaga na faapea mai e le na o tupe. Ia e faapena lava mea faapea, pe te i foi ua faapea mai le Vai latou, o le a supply uma atu suavai mo taaloga e aunoa ma se totogi ina ia tausasami atunuu nei i le manaia o le suavai lea e gaosi mai i o i elele o Faleolo, o le vai e mama e maua ai le ola e faavavau. Ona o loa lea o tagata ma ave, ma avatu ai lava ma le igoa o Samoa i atunuu i fafo. O le tasi lena mafuaaga o le saunoaga lea na faapea e le na o tupe, ae mafai foi ona auala mai in kind, i ituaiga e le aumaia se tupe ae aumai mea faapena. O mea uma la na e aofia i totonu o le sponsorship.

O le tulaga i TV rights ma mea faapena, o le mea lena o la e talanoa i ai le Pulega, o mea ia e talatalanoa ai ma le tatou foi au faasalalau iinei, ina ia aua ne i i ai se mea e misi. A o mea foi na i lalo o le Tulafono, e faamaumau lelei ma sue ma aumai i le Malo aua o le kamupani lea, o le kamupani a le Malo, e leai lava ma nisi e ese ai ma na o le tasi foi le tausaga. O le eseese o le kamupani lea ma isi kamupani, o kamupani na e faaauau, a o le kamupani lea

e faapitoa lava mo taaloga. Na ona uma lava o taaloga tapuni loa e le toe faaauauina ma sue ana tusi, o a tupe e maua e sau i le Malo.

Lau Afioga i le Fofoga Fetalai, o le faamatalaga lena ma le faaaloalo.

**FOFOGA FETALAI:** Malo faafetai.

*Na faamaonia le lafo ma faitauina le Tulafono Tau Faaofi o Taaloga a Tupulaga Talavou a Malo o le Taupulega 2015 (Tulaga Lagolago) 2014 i lona faitauga faalua.*

**TULAFONO TAU FAAOFI O TAALOGA A TUPULAGA TALAVOU  
A MALO O LE TAUPULEGA 2015 (TULAGA LAGOLAGO) 2014  
– iloiloga auiliili**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoao mo le iloiloga auiliili o le Tulafono Tau Faaofi lena.

E tusa ai ma Tulafono Tumau 102, e amata le Iloiloga Auiliili i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Tagata e lagolagoina.**

*Faamaonia.*

**FUAIUPU 4: Toesea mai o lafoga i lalo o le Tulafono o Lafoga o Tupe Maua.**

*Faamaonia.*

**FUAIUPU 5: O tiute a le Ofisa o Tiute.**

*Faamaonia.*

**FUAIUPU 6: Poloaiga a le Minisita.**

*Faamaonia.*

**FUAIUPU 7: Tuusaunoaina o kamupani mai lafoga o tupe maua.**

*Faamaonia.*

**FUAIUPU 8: Faamutaina o le aoga o le Tulafono.**

*Faamaonia.*

**FUAIUPU 9: Teuteuga faatupulaia ma tulaga faasaoina.**

*Faamaonia.*

**FUAIUPU 1 MA LE IGOA.**

**FUAIUPU 1: Igoa puupuu ma le amataga.**

**IGOA: Tulafono o Taaloga a Tupulaga Talavou a Malo o le Taupulega 2015 (Tulaga Lagolago) 2014.**

*Na faagasolo le Tulafono Tau Faaofi o Taaloga a Tupulaga Talavou a Malo o le Taupulega 2015 (Tulaga Lagolago) 2014 e aunoa ma se Teuteuga.*

**TULAFONO TAU FAAOFI O TAALOGA A TUPULAGA TALAVOU  
A MALO O LE TAUPULEGA 2015 (TULAGA LAGOLAGO) 2014  
– faitauga faatolu**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoao mo le faitauga faatolu o le Tulafono Tau Faaofi lenei.

Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Taaloga a Tupulaga Talavou a Malo o le Taupulega 2015 (Tulaga Lagolago) 2014 i lona faitauga faatolu.*

*Faaluaina e le Afioga i le Sui Palemia ma le Minisita mo Galuega tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ou te manatu o lea ua tatou taunuu i siui o a tatou galuega i lenei aso ma e manatu foi le agaga ma le faamoemoe na tatou tauavamea ai i a tatou Fonotaga i lenei masina mai lava i le uluai aso, Aso Lua, o lea ua tatou taulelei mai i le aso faaii, o le Aso Faraile lenei aua le faatinoina o a tatou polokalame ua uma ona faataatia.

I le agaga faaaloalo tele e momoli atu ai le faafetai tele mai ia te au nei o le Fofoga Fetalai i le paia ma le mamalu maualuga o le Maota, i le onosai mai lava i le uluai aso seia paia lenei vaega o le taeao na liugalua. Faamalo le onosai, faamalo le usufono, faamalo foi le faamalolosi mai i a tatou galuega. E talitonu lava le faamoemoe i le tele o le sao taua sa tatou feagai ai, e le gata o Tulafono Tau Faaofi faatoa faaulufale mai, o Tulafono Tau Faaofi sa faitau faalua ma felafolafoai ai, a o lea ua tatou pasia nisi o Tulafono Tau Faaofi taua e pei ona i ai le Tulafono Tau Faaofi faatoa maea atu nei. O le agaga ma le faamoemoe o a tatou galuega, ia tatou agai i le autafeloa i le faatulagaga o a tatou galuega e pei ona outou silafia, tatou te fuafua ma le talitonuga ia taunuu a tatou targets ua uma ona faataatia. Ma ou te molimau atu, ua ova atu ma le faamoemoe sa i ai ona ua tele galuega ua faatino.

E momoli atu le faafetai tele i le paia ma le mamalu o le Maota e ala i galuega ua uma ona faatulagaina. O le tulaga foi i faamoemoega, le paia e o le tatou Maota i ona tulaga faalupe, o le a se galuega ma se mea ua mafai ona tatou faia, e le o tatou. Ia tatou vivii ae ma faafetai i le Atua ona ua taunuu o tatou faamoemoe. Ia tatou mafaufau ma le loto maualalo i le faaaogaina o lo tatou valaauina, o i tatou o ni auuuna le aoga. O a foi tiute ma suaga a le vaatele i a outou fetalaiga, saunoaga ma malelega sa opea i le Maota, o fale nei - o Laloifi i inei. O faamoemoega i saunoaga ma fetalaiga ma le faaaliga o le tofa ma le faautautaga, le taufalemau ma le taupegaafa sa outou fofogaina, aemaise o la outou vagana fetalai, e talitonu o lo o nofo fale ia Satuiamaa i aai o finagalo.

Le paia e ma le mamalu o le Maota i manatu ma lagona felafolafoai, e talitonu lava e vaatele i lo outou finagalo. O a foi tiute sa outou aumai avatu, e faapena upufai o Malo. A tatou agai loa e saili le matagofie ma le lelei ma le faamaoni, e le milia faauu a tatou upu, a o lea lava e taumafai atu ma le agaga faaaloalo, e fai foi o lena a o lenei, leaga e leai se tagata e mafai ona toe faatuala, o le atunuu ua uma ona tofi, o le laau ua uma ona ta mamanu Tiafau o le malae o le faautugatagi a Samoa, ta te talii ae popoe, leaga o outou o lupe na faia mai i le fuifui i finagalo tusiaao o Samoa, tatou te omai e ave lo tatou ola ia aoga, tatou te omai e ave le soifua auuuna aua le manuia o Samoa nei ma le lumanai.

O lea, le paia e ma le mamalu o le tatou Maota, ia tatou maua le filemu o le Atua, ia tatou maua le agaga o le tatou talitonu ma le faamaoni, se mea ina a lelei o uso ae nonofo faatasi, tatou te militino ma maua le agaga fefinau ai ma le agaga o le fefaaaliga o taofi, ae tasi lava le faafitiga o aleaga, ia manuia Samoa mo le lumanai.

E faaleoina foi sou agaga faafetai Samoa ma lau tapuaiga, ou te talitonu o oe o le ao mamala, o le ia iviivia, e leai se isi na te toe mafai ona tu ma sausau i ou sa ma faigata, o paia e tumau, le paia i Aiga ma latou Tama, aemaise le usoga a Pule ma Tumua, o la outou fatuaiga tausi ma lou tootoo fetalai e teu ai ma tiu ai aiga faamalumalu a o outou alo i outou faiva alii, aua le tautuaina, tautua-upu, tautua-toto, tautua-tamaoiga ina ia manuia Samoa mo a taeao. Le aufai tatalo i so o se fatafaitaulaga mai ao i ona iu, ia, e talitonu o Samoa o

le atunuu ua uma ona faamanuia i ai le Atua. O le a foi sa outou faafogafoga i ni upu ma ni tala i ni agaga faasalavei ma le tiapolo feosofai, e talitonu o i ina le uta a le faimea, e tou te tatalo ina ia aua ne i valetuulima le Fonousu a le atunuu.

Le paia e ma le mamalu o le tatou Maota Fono, ua iu le tatou Fono sa tatou feagai ai mo lenei masina, o le a vavae foi foe mo le masina fou, ona tatou toe potopoto mai foi lea mo le tatou Fonotaga mo le masina mulimuli o lenei tausaga. E talitonu o lo o tapuaaoina pea lo outou soifua ma lo tatou ola i le alofa ma le agalelei o le Atua, ae tatou tatalo ia aua ne i afe se atua o le ala, ia mamao ni lagilagia i ni faafitauli o fetuleni mai ma ni mea tatou te le vaaia, ae tatou te talitonu e faasaga ae pea o tatou mata i mauga e oo mai ai lo tatou fesoasoani.

Ia, o si upu faatauvaava lea e tuuina atu i le tatou Maota, e talitonu le faamoemoe, e momoli atu ma moomooga alofa ia manuia le tatou faigamalaga i lenei foi masina ma le alo atu o le tatou Malo, le Afioga i le Palemia ma lana Kapeneta i le faaauauina o feau, tiute ma galuega, o faigamalaga foi, aemaise foi o lea Itu o le Maota ma sui usufono mamalu uma, aua le faaauauina o le faamoemoe mo le tatou galuega i le masina fou.

E faamanatu atu, o lo o i ai si mafutaga a tina o faletua uma o le paia ma le mamalu o le tatou Maota lenei, o lenei ua tufatufa atu tusi valaaulia mo le paia ma le mamalu o le tatou Maota e mafai ona aofaga potopoto atu. A o le avanoa lenei ou te valaau atu, po o ai lava e avanoa, e oo foi i lea Itu o le Maota, o lo o fai i uta i le Maota o Samoa, ua maua taumafataga eseese ma vaiinu suamalie ma isi mea uma e maua ai le faamalositino ma le soifua maloloina. O ai lava e avanoa i le mafutaga a tausala Samoa i le po a nanei, ia affio atu ma tala atu aao.

O le a faia le tatou lunch i le afiafi nei i le Tofilau Eti Alesana, o lea ua uma ona saunia e le Ofisa o le Fono, a maea ona outou affio foi lea i ila i le fale lea e taua e Lealailepule, o le fale o le ola, aua ne i toe faaaogaina o se fale o musumusuga ma isi mea, o le fale o le ola.

O le agaga lenei ma le faamoemoe o lenei afiafi, ae e manatu ua tatou taunuu i le taunuuga faaii mo a tatou galuega o lenei aso. Ou te tapa lau Afioga i le Palemia i se mea e te fia saunoa i ai ma faatu mai le tatou lafo.

## LAFO MO LE TOLOPOINA

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga o le a tatou tiu ia i le latasi i lau saunoaga mai le Nofoa i lou nofoalii. O tulaga uma foi na e saunoa i ai, o le agaga lava lea e tasi o le faamalo i sui usufono mamalu o le Maota, e ui ina puupuu nei aso sa tatou Fono ai, ae tele lava le galuega sa fai i Tulafono Tau Faaofi ua tatou pasia. Ia avea ia lou fofoga e fai mo tatou i lenei aso.

A o lou tulai atu lau Afioga i le Fofoga Fetalai e faatu le lafo, *Ina ia tolopo nei Taulumaga o le Fono Aoa seia oo i le Aso Lua, 16 Tesema 2014 ona tatou toe tauaofia foi lea i le Tauaofiaga faaii o lenei tausaga.*

*Faaluaina e le Sui Palemia ma le Minisita mo Tupe Maua.*

*Na faamaonia le lafo.*

**FOFOGAFETALAI:** A o le i faaiuina le tatou Fono, o le a faia le tatou tapuaiga e faamanuia ai le tatou taape atu ona tolopoina ai lea o le tatou Fono.

*Na tolopo Taulumaga a le Fono Aoao i le itula e 11:30 i le taeao seia aulia le Aso Lua, 16 Tesema 2014 e tusa ai ma le Polokalame o Fonotaga a le Palemene 2014/2015.*